

Ulloq 1. juuli 2020 aallarnerfigalugu ATV-nut qamuterallannullu akitsuutit peeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. (UKA2019/54)

(Inatsisartunut ilaasortaq Justus Hansen, Demokraatit)

Qamutit motorillit akileraarutaat pillugit Inatsisartut inatsisaata allannngortinnissaa, imaalillugu ATV-it taakkunungalu assingusut qamutit motorillit nunakkoortit mikinerit sisamanik amerlanernilluunniit assakaasullit ukiumut akileraarutaat 2.000 kronemut appartinnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut. (UKA 2019/135)

(Inatsisartunut Ilaasortaq Stine Egede, Inuit Ataqatigiit)

Uunga siunnersuut: Eqqussuinermit akitsuutit pillugit Inatsisartut inatsisaata allannngortinneqarneranik Inatsisartut inatsisaat nr. xx, xx. xxx 2019-imeersoq (Plug-in hybridbiilit akitsuutaat, biilinit innaallagissamik imaluunniit brintimik ingerlatilinnut akitsuummik akiliisussaanninneq kiisalu qamutit motorillit nunaannakkoortit minnerusut akitsuutaannik atorunnaarsitsineq) (UKA 2019/165)

(Partii Naleqqap Inatsisartunut ilaasortaaitai)

Uunga siunnersuut: Qamutit motorillit akileraarutaat pillugit Inatsisartut inatsisaata allannngortinneqarneranik Inatsisartut inatsisaat nr. xx, xx. xxx 2019-imeersoq. (Qamutitut motorilinnut taamaallaat innaallagissamik brintimilluunniit ingerlatilinnut plugin hybridbiilinnullu akitsuut, qamutitut motorilinnut nunakkoortitut mikinerit akitsuuteqartitsinnginneq kiisalu akiliinissamut piffissaliussamik allanngineq) (UKA 2019/166)

(Partii Naleqqap Inatsisartunut ilaasortaaitai)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinninneq

Aningaasaqarnermut Akileraartarnermullu Ataatsimiititaliaq aalajangiiffigisassatut siunnersuutitut marlunnut inatsisissatullu siunnersuutitut marlunnut ataatsimut isumaliutissiissummik saqqummiussivoq. Taamattaq taakkununga Naalakkersuisut ataatsimut akissuteqaateqassapput.

Ataatsimiititaliap isumaqatigiittup immikkoortut 54 aamma 135 akuerineqarnissaat taamatullu 165-ip itigartitsissutigineqarnissaa inassutigigaa Naalakkersuisut paasivaat. Taamattaq

ataatsimiititaliami amerlanerussuteqartut immikkoortoq 166-imut akuerineqarnissaanut inassutigineqartumut allannguutissatut siunnersuummik saqqummiussipput. Allannguutissatut siunnersuutikkut qamuteralaat ATV-llu eqqunneqarneranni akitsuut peerneqarsinnaangorniarlugu plug-in hybridbiilit ilaannakortumik qamutininut motoorilinnut akitsuuserniarneqarput.

Naak immikkoortoq 166-imut allannguutissatut siunnersuummi iluanaarutaanerusussat immikkoortut 54-ip 135-llu akuerineqarneranni iluanaarutitigut annaasanik matussusiinngikkaluartut, taamaattoq Naalakkersuisut allannguutissatut siunnersuut tusaatissatut tiguaat. Taamattaq Naalakkersuisut ataatsimiititaliap isumaqatigiittup inassuteqaatai akueraat. Ataatsimiititaliaq isumaliutissiissummini piaartumik qamutininut motoorilinnut akitsuutininut, qamutillu motoorillit eqqussorneqarneranni akitsuutininut ataatsimut inatsisissatut siunnersuummik Naalakkersuisut piaartumik saqqummiussinissaannik kaammattuisoq Naalakkersuisut maluginiarpaat, taamaaliornikkut ataatsimiititaliap inassuteqaataata malitsigisaanik iluanaarutitigut annaasat matussuserneqarsinnaaqullugit.

Immikkoortunut 54-imut 135-mullu inatsisit allannguutissaatut nassuiarneqartut 2020-mi upernaakkut ataatsimiinnissamut Naalakkersuisut naammassiniarumavaat, inatsisilli ilusilersorneqarnerisa, tusarniaanerit il.il., kiisalu siunnersuutit piareersaasiorteranni susassaartut akuliutsinnissaat eqqarsaatigalugit, inatsisissatut siunnersuutit 2020-mi ukiakkut ataatsimiinnissamut piareernissaat ilimanaateqarneruvoq. Taamattaq qamuteralannik ATV-nillu eqqussuinerulerneq qanoq piniagassanik, soorlu tuttunik umimmannillu aqutsinermut sunniuteqassanersoq qulaajassallugu naapertuussinnaavoq. Qamutinit motoorilinnit taamaattunit akornusersuinerit piniagassanut taakkununga ajornartorsiutaasorinarpoq, tamannalu inuussutissarsiutigalugu nuna tamakkerlugu piniarnermut, saniatigooralugu piniarnermut kiisalu tammajuitsussarsiorluni piniarnermut annertuumik sunniuteqarpoq.

Qujanaq.